



Fréttabréf AkureyrarAkademíunnar

júní 2025

Kæru viðtakendur!

Í fréttabréfinu er stiklað á stóru um starfsemina hjá AkAk á síðasta starfsári. Við þökkum öllum sem komið hafa að starfseminni á liðnu starfsári fyrir þeirra framlag og ánægjulegt samstarf. Góðar stundir í sumar!

Stjórn og fulltrúaráð

Á ársfundi AkAk 2025 sem fór fram 15. maí sl. var kosið í stjórn og fulltrúaráð fyrir starfsárið 2025 til 2026. Í stjórn eru Sigurgeir Guðjónsson, formaður, Þórhallur S. Bjarnason, gjaldkeri, og Þorgerður Anna Björnsdóttir, ritari. Aðrir í fulltrúaráði eru Arna Dögg Arnardóttir, Bryndís Fjola Pétursdóttir, Gunnar Árnason og Jón Örn Pálsson.

Fjármál og rekstur

Fjármál og rekstur AkAk gengu vel á starfsárinu, og sýnir ársreikningur fyrir árið 2024 jafnvægi í fjármálum og rekstri.

Vinnuaðstaða og innanhúsfólk

Í húsnæði AkAk eru vinnupláss fyrir 12 einstaklinga hverju sinni. Tvö af þessum 12 plássum eru fyrir frumkvöðla til að vinna að þróun nýsköpunar- og frumkvöðlaverkefna samkvæmt samningi Akureyrarbæjar og AkAk. Alls voru 25 einstaklingar með vinnuaðstöðu hjá AkAk á árinu 2024 til lengri eða skemmri tíma. Eins og áður hefur innanhúsfólk unnið að fjölbreyttum viðfangsefnum: stundað háskólanám, sinnt störfum/verkefnum óháð staðsetningu, unnið að frumkvöðlaverkefnum, og að fræði- og ritstörfum/annarri þekkingarsköpun sem sjálfstætt starfandi einyrkjar. Samdráttur varð í eftirspurn eftir vinnuaðstöðu á Covid-tímanum en frá hausti 2022 voru öll vinnupláss komin í notkun og síðan þá hefur verið full nýting á útleigðri vinnuaðstöðu og biðlisti eftir að komast að.

Innanhústarf

Löng hefð er fyrir félagslegri samveru og ýmsu samstarfi innanhúsfólks, eins og tiltektardögum, súpufundum, vorferðum og jólaboðum. Á súpufundum hittist fólk í hádeginu og segir frá verkefnum sínum og rætt er um það sem er á döfinni í starfsemi AkAk. Auk þessa má nefna að haldið var opið hús í tilefni af Akureyrarvöku samkvæmt venju en þá er bæjarbúum boðið að koma í heimsókn til að kynna sér starfsemina og skoða aðstæður. Einnig var frambjóðendum stjórnmalaflokkanna í Norðausturkjördæmi sem tóku þátt í Alþingiskosningunum í nóvember 2024 boðið í heimsókn til að kynnast starfsemi AkAk. Langflestir flokkar þekktust boðið og sköpuðust gagnlegar samræður innanhúsfólks og frambjóðenda. AkAk hafði ennfremur milligöngu um námskeið fyrir félaga sína um skapandi skrif um veruleikann. Leiðbeinandi var Björg Árnadóttir hjá Stílvopninu.

Viðhorfskannanir

Einn liður í stefnu AkAk er að leggja fyrir árlegar kannanir meðal þeirra sem leigja þar vinnuaðstöðu þar sem spurt er um viðhorf til aðstöðu og þjónustu hjá stofnuninni og var fyrsta könnunin lögð fyrir vorið 2022. Markmiðið er að greina starfsemina og að nýta niðurstöður til að bæta hana. Niðurstöður kannana hafa sýnt almenna ánægju með aðstöðu og þjónustu hjá AkAk og þar hafa einnig komið fram gagnlegar ábendingar um á hvaða sviðum þurfi að skerpa á áherslum, svo sem varðandi ýmis konar búnað. Á liðnum árum hefur margvíslegur búnaður verið endurnýjaður og fjárfest í nýjum. Hér má nefna rafdrifin hæðarstillanleg vinnuborð, litaprentari með skanna, tæknibúnaður í fundarherbergi til að stunda nám og sinna öðrum verkefnum, óháð staðsetningu, lofthreinsitæki til að bæta loftgæði í húsnæðinu og þráðlaus heyrnartól.

Fréttabréf

Á starfsárinu komu út samkvæmt áætlun fimm fréttabréf en þau hófu göngu sína í nóvember 2020. Tilgangur fréttabréfanna er að miðla upplýsingum til félaga og samstarfsaðila um það helsta í starfinu hjá AkAk hverju sinni og að styrkja gagnkvæm tengsl og samskipti.

Gagnagrunnur um verkefni og viðburði

Í október 2021 kom út skýrsla sem Margrét Guðmundsdóttir, sagnfræðingur, tók saman í tilefni af 15 ára afmæli AkAk sem hefur að geyma skrá yfir verkefni sem fólk vann að hjá AkAk frá árinu 2006 og viðburði sem AkAk var með á sama tímabili. Skránum var komið fyrir í [gagnagrunni](#) á vefsíðu AkAk. Í skýrslunni kemur fram að á tímabilinu frá 2006 og til 31. ágúst 2021 voru 97 einstaklingar með vinnuaðstöðu hjá AkAk, langflestir þeirra voru námsmenn og/eða kennarar við innlenda og erlenda háskóla og þar að auki margbreyttur hópur vísinda- og fræðimanna, listamanna og frumkvöðla sem flestir eru einyrkjar. Innanhúsfólk vann að fjölbreyttum hugðarefnum: lokaverkefnum í háskólanámi (grunn-, framhalds- og doktorsnám) á fjölda fræðasviða, greinum/köflum í tímaritum/bókum, ritverkum, sýningum, frumkvöðlaverkefnum, skýrslum og námsefni. Á sama tímabili stóð AkAk fyrir ríflega 150 viðburðum af margvíslegu tagi.

Eftir að skýrslan kom út hafa skrár um fjölda innanhúsfólks, verkefni og viðburði, verið uppfærðar jöfnum höndum og upplýsingar færðar inn í gagnagrunninn. Frá 31. ágúst 2021 og til ársloka 2024 voru 30 einstaklingar með vinnuaðstöðu hjá AkAk, þar af 10 frumkvöðlar, átta voru í fjarvinnu (óstaðbundin störf/verkefni), sjö voru sjálfstætt starfandi og fimm voru í námi við innlenda og erlenda háskóla. Þar að auki voru 21 aðrir einstaklingar með aðstöðu hjá AkAk á þessu tímabili en þá er að finna á eldri nafnalistum um innanhúsfólk (hver einstaklingur er bara talinn einu sinni). Innanhúsfólk vann að fjölbreyttum hugðarefnum: lokaverkefnum í háskólanámi (grunn- og doktorsnám) á ýmsum fræðasviðum, skýrslum/umsögnum, greinum/köflum í tímaritum/bókum, frumkvöðlaverkefnum og ritverkum. Frá 6. október 2021 og til ársloka 2024 stóð AkAk einnig fyrir 56 viðburðum af margvíslegu tagi.

Ytra samstarf

- **Akureyrarbær**

Þann 16. maí 2024 endurnýjuðu Akureyrarbær og AkureyrarAkademían samstarfssamning um stuðning við frumkvöðlastarf sem felur í sér að bjóða tveimur einstaklingum upp á vinnuaðstöðu í húsnæði AkAk til að vinna að þróun frumkvöðla- og nýsköpunarverkefna og greiðir Akureyrarbær fyrir vinnuaðstöðuna. Úthlutunartímabil eru tvö á hverju ári, annars vegar frá 1. mars – 31. ágúst og hins vegar frá 1. september – 28. febrúar og er auglýst eftir umsóknum í janúar/febrúar vegna fyrra

tímabilsins og í ágúst vegna þess síðara. Frumkvöðlarnir hafa unnið að fjölbreyttum verkefnum: hugbúnaðarlausnum á netinu fyrir fyrirtæki, dans- og hreyfimeðferð sem meðferðaráætlun fyrir félagslega heilsu á Íslandi, varðveislu sagnaarfs um álfa og huldufólk á Akureyri/Eyjafirði, uppbyggingu hátæknigróðurhúss, kynningar- og fræðslufni um tegundir og táknfræði blóma í menningar- og sögulegu samhengi, uppbyggingu núvitundarseturs, uppbyggingu hreinlætisaðstöðu á ferðamannastöðum, gerð sjónvarpsþátta um óbyggðir á Íslandi, undirbúningi að Sjávarlífssafni á Akureyri og gerð sýningar um sjávarlíf, undirbúningi að leiklistarskóla á Akureyri fyrir aldurinn 16 - 23ja ára og leiklistarnámskeiði fyrir fólk á aldrinum 67 ára og eldri.

- **Háskólinn á Akureyri**

Samkvæmt samstarfssamningi HA og AkAk þá veitir AkAk skólanum árlega upplýsingar um innanhúsfólk með það fyrir augum að HA geti leitað til þeirra um að taka að sér kennslu eða önnur verkefni.

AkAk og félagsvísindadeild HA stóðu saman að viðburði í HA í september 2024 undir yfirskriftinni „Félagastarf, lýðræðis- og stjórn málaþróun á Íslandi 1875-1968. Kynningar á nýjum rannsóknum“. Þar kynntu Hrafnkell Lárusson og Skafti Ingimarsson nýjar rannsóknir sínar á þessu fræðasviði. Rannsókn Hrafnkels heitir „Lýðræði í mótun – áhrif félagsshreyfinga á lýðræðisþróun á Íslandi 1874–1915“, og Skafta „Nú blakta rauðir fánar: Saga kommúnista- og sósíalistahreyfingarinnar á Íslandi 1918–1968“.

AkAk og HA efndu einnig til opins kynningarfundar í HA í apríl 2025 um starfsemi AkAk undir yfirskriftinni „Fjölbreytt og skapandi samfélag“. Áslaug Ásgeirsdóttir, rektor HA, setti fundinn með ávarpi, Sigurgeir Guðjónsson, formaður stjórnar AkAk, kynnti starfsemi Akademiunnar, innanhúsfólk sagði frá verkefnum sínum, Tom Barry, forseti hug- og félagsvísindasviðs HA, sleit fundinum með nokkrum orðum, og Katrín Eiríksdóttir, verkefnastjóri í HA, stýrði samkomunni.

- **Reykjavík Akadémían**

Sameiginlegur póstlisti akademíanna var notaður eins og áður til að miðla ýmsum upplýsingum og fréttum. Samstarfssamningur akademíanna var endurnýjaður í maí 2024 til næstu þriggja ára, og í byrjun febrúar 2025 var haldinn netfundur akademíanna um samstarfsmál.

Viðburðir

- **Fyrirlestrar fyrir íbúa hjúkrunarheimilanna og aðra bæjarbúa**

Undanfarin ár hefur verið samstarf á milli AkAk og öldrunarheimila Akureyrar, og nú hjúkrunarheimila Heilsuverndar, sem felur í sér að bjóða íbúum heimilanna upp á fræðandi og aðgengilega fyrirlestra um fjölbreytt viðfangsefni sem eru líka opnir fyrir aðra bæjarbúa. AkAk leitar bæði til félaga sinna um tillögur að fyrirlestrum og líka til einstaklinga utan hópsins. Á árinu 2024 voru skipulagðir átta fyrirlestrar. Menningar- og viðurkenningasjóður KEA og samfélagssjóður Norðurorku hf. styrktu viðburðina og sóttu þá tæplega 500 gestir. Á árinu 2025 verður íbúum heimilanna boðið upp á fjóra fyrirlestra.

- **Bakarís-fyrirlestrar**

Bakarís-fyrirlestrarnir eru samstarfsverkefni AkAk og Brauðgerðarhúss Akureyrar í Sunnuhlíð. Markmið þeirra er að kynna verkefni sem fólk hefur unnið að hjá AkAk, bjóða upp á viðburði í Sunnuhlíð og gefa bæjarbúum tækifæri til að fræðast og spjalla um fjölbreytt viðfangsefni. Einn bakarís-fyrirlestur var haldinn á árinu 2024. Martina Huhtamäki, kennari við háskólann í Helsinki, sagði

frá rannsóknum sínum á tungumálalandslaginu á Akureyri út frá samfélagslegu sjónarhorni. Stefnt er að því að bjóða upp á fleiri bakarís-fyrirlestra á þessu ári.

Aðrir viðburðir

Konfúsíusarstofnunin Norðurljós við HÍ og Huldustígur ehf. stóðu fyrir *Hátíð drekans við Skjálfandafljót* sumarið 2024 vestan fljótsins við Goðafoss. AkureyrarAkademían og Þingeyjarsveit styrktu verkefnið. Tilfnið var að á árinu 2024 var ár drekans í Kína samkvæmt kínversku tímatali og því þótti upplagt að heiðra drekann við fljót eða vatn á Íslandi og varð Skjálfandafljót fyrir valinu en drekinn er einn af landvættum Íslands og á sér langa og merkilega sögu hér á landi. Á hátíðinni leiddi Bryndís Fjóra Pétursdóttir gesti inn í heim drekans, Jón Friðrik Benónýsson sagði frá sögu drekans sem landvætti, Þorgerður Anna Björnsdóttir sagði frá tengingu drekans við menningu Kína og las kínverska þjóðsögu um dreka, Helga A. Erlingsdóttir ræddi um sögu og mannlíf við fljótið og Goðafoss, Rakel Hinriksdóttir skapaði dreka sem gestir hátíðarinnar fengu að mála og Þorgerður Anna kynnti temenningu og bauð gestum að dreypa á tei frá Kína. Hópur frá AkAk sótti viðburðinn.

AkureyrarAkademían, Sunnuhlíð 12, 603 Akureyri, sími 833-9861, vefang <https://www.akak.is/>
Ábyrgðarmaður Fréttabréfs Aðalheiður Steingrímsdóttir, netfang akak@akak.is